

## कागभुसुंडी रामायण

नाथ कुतारथ भवउँ मैं तव दरसन खगराज ।  
आयसु देहु सो करौ अब प्रभु आयहु केहि काज ॥

सदा कृतारथ रुप तुम्ह कह मृदु बचन खगेस ।  
जेहि कै अस्तुति सादर निज मुख कीन्हि महेस ॥

सुनहु तात जेहि कारन आयउँ ।  
सो सब भयउ दरस तव पायउँ ॥

देखि परम पावन पव आश्रम ।  
गयउ मोह संसय नाना भ्रम ॥

अब श्रीराम कथा अति पावनि ।  
सदा सुखद दुख पुंज नसावनि ॥

सादर तात सुनावहु मोही ।  
बार बार बिनवउँ प्रभु तोही ॥

सुनत गरुड कै गिरा बिनीता ।  
सरल सुप्रेम सुखद सुपुनीता ॥

भयउ तासु मन परम उछाहा ।  
लाग कहै रघुपति गुन गाहा ॥

प्रथमहिं अति अनुराग भवानी ।  
राम चरित सर कहेसि बखानी ॥

पुनि नारद कर मोह अपारा ।  
कहेसि बहुरि रावन अवतारा ॥

प्रभु अवतार कथा पुनि गाई ।  
तब सिसु चरित कहेसि मन लाई ॥

बालचरित कहि बिबिधि बिधि मन महँ परम उछाह ।  
रिषि आगवन कहेसि पुनि श्री रघुबीर बिबाह ॥

बहुरि राम अभिषेक प्रसंगा ।  
पुनि नृप बचन राज रस भंगा ॥

पुरबासिन्ह कर बिरह बिषादा ।  
कहेसि राम लछिमन संबादा ॥

बिपिन गवन केवट अनुरागा ।  
सुरसरि उतरि निवास प्रयागा ॥

बालमीक प्रभु मिलन बखाना ।  
चित्रकूट जिमि बसे भगवाना ॥

सचिवागमन नगर नृप मरना ।  
भरतागवन प्रेम बहु बरना ॥

करि नृप क्रिया संग पुरबासी ।  
भरत गए जहँ प्रभु सुखरासी ॥

पुनि रघुपति बहु बिधि समुझाए ।  
लै पादुका अवधपुर आए ॥

भरत रहनि सुरपति सुत करनी ।  
प्रभु अरु अत्रि भेंट पुनि बरनी ॥

*कहि बिराध बध जेहि बिधि देह तजी सरभंग ।  
बरनि सुतीछन प्रीति पुनि प्रभु अगस्ति सतसंग ॥*

कहि दंडक बन पावनताई ।  
गीध मइत्री पुनि तेहिं गाई ॥

पुनि प्रभु पंचवटीं कृत बासा ।  
भंजी सकल मुनिन्ह की त्रासा ॥

पुनि लछिमन उपदेस अनूपा ।  
सूपनखा जिमि कीन्हि कुरुपा ॥

खर दूषन बध बहुरि बखाना ।  
जिमि सब मरमु दसानन जाना ॥

दसकंधर मारीच बतकही ।  
जेहि बिधि भई सो सब तेहि कही ॥

पुनि माया सीता कर हरना ।  
श्रीरघुबीर बिरह कछु बरना ॥

पुनि प्रभु गीध क्रिया जिमि कीन्ही ।  
बधि कबंध सबरिहि गति दीन्ही ॥

बहुरि बिरह बरनत रघुबीरा ।  
जेहि बिधि गए सरोवर तीरा ॥

*प्रभु नारद संवाद कहि मारुति मिलन प्रसंग ।  
पुनि सुग्रीव मितार्ई बालि प्राण कर भंग ॥*

*कपिहि तिलक करि प्रभु कृत सैल प्रवरषन बास ।  
बरनन वर्षा सरद राम रोष कपि त्रास ॥*

जेहि बिधि कपिपति कीस पठाए ।  
सीता खोज सकल दिसि धाए ॥

बिबर प्रबेस कीन्ह जेहि भाँति ।  
कपिन्ह बहोरि मिला संपाती ॥

सुनि सब कथा समीरकुमारा ।  
नाघत भयउ पयोधि अपारा ॥

लंकाँ कपि प्रबेस जिमि कीन्हा ।  
पुनि सीतहि धीरजु जिमि दीन्हा ॥

बन उजारि रावनहि प्रबोधी ।  
पुर दहि नाघेउ बहुरि पयोधी ॥

आए कपि सब जहँ रघुराई ।  
बैदेही की कुसुल सुनाई ॥

सेन समेति जथा रघुबीरा ।  
उतरे झाई बारिनिधि तीरा ॥

मिला बिभीषन जेहि बिधि आई ।  
सागर निग्रह कथा सुनाई ॥

*सेतु बाँध कपि सेन जिमि उतरी सागर पार ।  
गयउ बसीठी बीरबर जेहि बिधि बालिकुमार ॥*

*निसिचर कीस लराई बरनिसि बिबिधि प्रकार ।  
कुँभकरन घननाद कर बल पौरुष संघार ॥*

निसिचर निकर मरन बिधि नाना ।  
रघुपति रावन समर बखाना ॥

रावन बध मंदोदरि सोका ।  
राज बिभीषन देव असोका ॥

सीता रघुपति मिलन बहोरी ।  
सुरन्ह कीन्हि अस्तुति कर जोरी ॥

पुनि पुष्पक चढि कपिन्ह समेता ।  
अवध चले प्रभु कृपा निकेता ॥

जेहि बिधि राम नगर निज आ ए ।  
बायस बिसद चरित सब गाए ॥

कहेसि बहोरि राम अभिषेका ।  
पुर बरनत नृपनीति अनेका ॥

कथा समस्त भुसुंड बखानी ।  
जो मैं तुम्ह सन कही भवानी ॥

सुनि सब राम कथा खगनाहा ।  
कहन बचन मन परम उछाहा ॥

*गयउ मोर संदेह सुनेउँ सकल रघुपति चरित ।  
भयउ रामपद नेह तव प्रसाद बायस तिलक ॥*